



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 3



Myanmar mitkar leniri yimtenren angatetteptsü ajungshir



Karni Sena tir Sukhdev Singh Gogamedi khaset

VOL. XXI NO. 59 (ADOK 59) DIMAPUR

RASEMNÜ (WEDNESDAY)

LUCHII (DECEMBER) 06, 2023

₹ 5.00

IDAN-i Manipal Academy den MoU sign sütep Nagaland nungi kaketshirtem 25% fee exemption alitsü

Kohima, December 5, 2023 (DIPR): Investment and Development Authority (IDAN)-i tesüba nung Manipal University den tenangzüktep agia aliba nung ajemdaker December 5, 2023 nü kaketshirtem atema MoU ka nung sign sütepogo.

Nagaland nungi kaketshirtemi Manipal Academy of Higher Education nung paramedical studies azüngsü atema MoU sign sütep.

Iba MoU kübok Nagaland nungi kaketshir kati MAHE nung admission asüba sülen ita ka tsüngda 25% fee exemption meshitsü akok.

MAHE nung admission asüba sülen kaketshirtemi IDAN dang Nagaland nungi kaketshir ta asüba kulikaket meshitsü akok. MAHE-i kümshia melenshiba general fee structure nungi 25% fee reduction angutsü.

Iba MoU kübok Nagaland nungi kaketshirtem atema menden 220 mekazüka yutsür. Iba dak sendakba osang tejangja IDAN website nung agütsütsü aser külen kaketshirtemi education loans agitsü atema MAHE-i yariteptsü.

MAHE nung agiba course balala ya UK aser EU sorkartemi agizüka lir aser kaketshirtemi course atemba sülen UK aser tanga European linüktem nung mapa inyaksü atema tatidang balala agütsütsü.

MAHE nung academic year 2022-23 atema best out-going student Dr. Dziesebeinuo Khezic (PT)-ia Manipal nung züngnür kaketshirtem aser parnok tsüraburtem den ajuruteptsü mulunga aliba osang metetdaksü. La ya tang Putuonuo Hospital nung inyaker.

BAN-i Bangladesh High Commission telok den ajurutept

Dimapur, December 5, 2023 (TYO): December 5, 2023 nü Business Association of Nagas (BAN)-i High Commission of Bangladesh teshimtet telok ka pelashishia agizükogo.

Iba sentong ya Hotel Saramati, Dimapur nung agi aser Assistant High Commissioner of Bangladesh & Head of the Mission in Guwahati Ruhul Amin-i aniba teloki BAN züngsemtem den senden ka amen.

Ruhul Amin-i züngsem 7 agi akümba teshimtet telok ka anir Nagaland semdangi arua lir aser pai iba senden amentsü ayongtep.

“Bangladesh aser Business Association of Nagas tsüngda tesentaktep akanga lir aser tajungba akümer” ta Ruhul Amin-i ashi.

“Taküm May ita BAN teshimtet telok kati Bangladesh semdangdang MoU 34 nung sign sütepa liasü. Dimapur ya Northeast nung hub tulutiba nung tanabuba lir aser Bangladesh o Nagaland tsüngda shishilembatsü maongka aika lir” ta pai ashi.

Nagaland nung ali rongsen jenti lir aser BAN-i maparen tezübaba akümtsü atema meranger. Tetsükdaksütem koktetba sülen BAN-i shishilembaba maparen tiptema inyaksü renema lir” ta BAN President L Mongkum Jamir-ia ashi.

Iba senden nung Bangladesh aser Nagaland tsüngda rongsenketzüng tsütsü amalitep alitsü aser renloka aotsü atema jembitep ta Executive Director, BAN Jason Sanglir-i sangdong ka nung ashi.

2024 tashi nung Dhansiri-Zubza rail line renemtsü

Dimapur, December 5, 2023 (Agencies): Molvom aser Pherima tashi Dhansiri-Zubza new line project September 2024 nung renemtsü ta North East Frontier Railway (NFR) General Manager Chetan Kumar Shrivastava-i ashi.

Hombarnü Shrivastava-i chief minister Neiphiu Rio den ajurutept senden amendang iba ya nangzük.

“State sorkari mepishiba ama Railways-i Molvom nung Goods Yard ka yanglutsü. NFR-i Nagaland nung nungdakba ama rail infrastructure renloksü” ta General Manager-isa nangzük.

Nagaland nung railways dak sendakba tebilemstütem atema

NFR-i high-level committee ka tentettsü mepishiba sorkari agizükker aser iba Committee ya küm nung pezüben ajurutepa senden amentsü, ta CM Rio-ia ashi.

NFR-i 2026 nung lapoktsüba aliba Kohima connectivity project dak alia ano Kohima aser Imphal tsüngda direct rail connectivity atema nükjidong lir.

Zubza-Imphal new line atema Reconnaissance Engineering cum Traffic survey mapa renemogo aser joko NFR-i kobi melii Final Location Survey tenzüksü.

2022 küm NFR-i Shokhuvi Railway station lapokogo aser iba ya Nagaland nung Dimapur sülen railway station tanabuba lir.

Anogo 5 tsüngda Kisama-i nisung 78,000 tema aruogo



December 5, 2023 nü Hornbill Festival “Cultural Connect” nung Khamniungan Cultural Troupe-i Luniak Tshilo (Harvesting of Jobs Tear) shilem agiba noksa nung angur.

Kohima, December 5, 2023 (TYO): Naga Heritage Village Kisama nisung Hornbill Festival tenzükker anogo pungububa tashi nung nisung 78,000 tema aruogo.

Anogo pungu nung nisung 78,395 tashi Kisama-i aruogo. Parnokji locals 56115, domestic tourists 20659 aser foreign tourists 1621 liasü ta Tourism Department-i metetdaksü.

Anogo pungu tsüngda nisung teimtiba arubaji Deobarnü liasü. Iba anogo Kisama-i nisung 18,002 aru. Parnokji locals 12,578, domestic tourists 5001 domestic tourists aser foreigners 423 liasü, ta parnokisa ashi.

December 5, 2023 nü Naga Heritage Village, Kisama nung tanü agi anogo pungububa “Cultural Connect” sentong agiogo.

Iba sentong ya Department of Art & Culture-i ayongzükker aser tanü GOC 101 AREA LT.Gen. Sanjay Malik-i tongti

tesemdang aser Awang Jongwang Konyak-i lisopur tejaoker ama shilem agiogo.

Tanü sentong atema host ji Health & Family Welfare Minister P. Paiwang Konyak liasü aser MLA Kuzholuzo Nienu aden. Maneni Konyak nung Awang Jongwang-i sobaliba temoatsü meshi.

Anepdang agiba sentong nung Yimkhiung Cultural Troupe-i Saramati (Folk Dance), Kuki Cultural Troupe-i Lamkol Lam (Dance), Tikhir Cultural Troupe-i Ayoliu (Women Folk Song), Kachari Cultural Troupe-i Daosri Delai (Folk Dance), Pochury Cultural Troupe-i Thulow Yak (Sanctification of Fields Ritual), Lotha Cultural Troupe-i Pvpvpu to Phetala Chachung To La Phetala (Folk Song), Konyak Cultural Troupe-i Dang Athui & Azap (Bamboo shoving), Garo Cultural Troupe-i Rugala Chroka

(Harvest Dance) aser Angami Cultural Troupe-i Terhü Dojü (Indigenous Games) shilemtem agia liasü.

Tanü nikongdang agiba sentong nung Rural Development and SIRD Minister Metsubo Jamir-i host aser Treasuries & Accounts and Art & Culture Advisor Konngam Konyak-i co-host ama shilem agi. Iba sentong nung CO Founder, Liamtra, Vianney Ruangmei-i Honoured Guest ama shilem agi aser MLA Achumbemo Kikon aden.

Sentong nung Rengma Cultural Troupe, Zeliang Cultural Troupe, Phom Cultural Troupe, Sumi Cultural Troupe, Sangtam Cultural Troupe, Chakhesang Cultural Troupe, Khamniungan Cultural Troupe, Ao Cultural Troupe aser Chang Cultural Troupe ajanga shilem balala agia liasü.

Longleng nung Oting lendong bilemteta Black Day among

Dimapur, December 5, 2023 (TYO): December 4 & 5, 2021 anogotem Oting lendong bilemteta Longleng jila nung taküm agi küm tanabuba Black Day ayonga mongogo.

Mongulbarnü PPC Hall nung agiba sentong nung Phom People’s Council (PPC), Phomla

Hoichem, Phom Students’ Conference aser Dobashis dena Civil Society Organizations (CSOs) aika aden.

Mon district nung sepaitem ket nung tai maketba civilian 14 asüba bilemteta aser parnok nem tetushi agüja iba sentong ayonga agiogo.

Iba sentong nung temeten

meshiba aser AFSPA agientsü takhangba agüja Phom People’s Council office nung wako tanak ka atsüketa liasü.

Phom Students’ Conference aser Phomla Hoichem-ia tasürtem atema temeten meshiba den tanga AFSPA agientsü takhangba agütsü.

Nagaland nung ninang metsüba wadang tuluba inyaktettsü

Kisama, December 5, 2023 (TYO): Nagaland nung alemli nungi ninang metsüba arur aser süngdonglidong peria aliba den alinük tapet ajanga ninang metsüba maparen tuluba inyaka otettsü ta Deputy chief minister T.R Zeliang-i ashi.

“Nagaland Beekeeping & Honey Mission (NBHM) lenisüba kübok yimdaklir nem training agütsür aser tanübo ninang metsüba ajanga taküm libaliroa oteter” ta pai ashi.

Mongulbarnü Bamboo Hall, Kisama nung 5 buba Nagaland Honey Bee Day amongdang pai iba osang metetdaksü. Iba sentong ya Nagaland Beekeeping & Honey Mission (NBHM)

ajanga ayongzük.

“Alemli mapang nungi ninang metsüba ninangmojitzü atema dang liasü saka NBHM-i inyakba ajanga tanübo bee wax amala tajangzüktem agir aser ninang tema senzüba ajanga tsünusenbongba nunga tajangzük anguba indangnübortem nem metetdaksür” ta T.R Zeliang-isa ashi.

“Nagaland nung ninang metsür nisung lakh I tema lir aser NBHM-i yimtsüng 500 shi ka nung ano nisung 25,000 tema aniokogo. Nagaland nungi kümshia ninangmojitzü 440 Metric Tonne (MT) adoker aser 2030 tashi nung 2000 Metric Tonne (MT) adoktsü alizüng yua lir” ta pai ashi.

Nagaland nung adokba ninangmojitzü ya kanga tajung lir aser iba ya ninangtemi naro tapu balala nungi agitetba ajanga lir, ta paisa ashi.

“North Eastern Council (NEC)-i ninang metsürtem yariteptsü mepishir. Ano NBHM atema National Bee Board (NBB) dangnungia teyari meshitsüla” ta TR Zeliang-isa shisem.

NBHM-i Ministry dangi abentsüla aser nungdak süra state sorkari Mission yaritsü mulunga lir, ta paisa ashi.

NBHM-i Hornbill Festival 2023 mapang ‘Bee Tourism’ tenzükba ajanga tarurtemi sobaliba nungi bentshia aruba ninang metsüba inyakyimtem angutsü ta Zeliang-isa ashi.

Phek jila nung State Handloom Expo tenzükogo Mokokchung nung Christmas Cake Race alitsü



Dimapur, Luchii/December 05 (TYO): C. Tsalimse Sangtam EAC Phek ajanga December 5, 2023 anepdang 11:00 ako nung State Handloom Expo sentong Town Hall, Phek Town nung lapokja liasü.

Iba Expo ya Nagaland Handloom & Handicrafts Development Corporation Ltd.,

Dimapur ajanga ayongzük aser Office of the Development Commissioner for Handloom, Ministry of Textiles, Govt. of India, New Delhi ajanga sponsor asü.

Iba sentong ya December 18, 2023 nü tembangsü. Iba Expo nung Arunachal Pradesh, Assam aser Nagaland state

kübok district balala nungi nisung 60 arua stall balala lapoka lir.

Meta balala nung aliba olangla amshir aser teka mapa balala inyakertem nem marketing channels aser export markets tajungba aser tuluba agütsüsü nükjildong nung iba Expo ya ayongzükba lir.

Chiephobozou nung World Soil Day amung

Dimapur, Luchii/December 05 (TYO): Alima ajunga den külemi Directorate of Soil & Water Conservation, Nagaland ajanga December 5, 2023 nü World Soil Day ya Kohima district kübok Chiephobozou nung aliba Sub-Divisional Office ka nung munga liasü.

Ali temu tajung asoshi temolung agütsüsü aser ali nungi adokba rongsen tajungtiba nung anepalua amshitsü asoshi osang sangdonga World Soil Day ya küm shia December 5 nü amunger.

World Soil Day ya alima asoshi sapang balaka lir aser ali temu benjongba kisung masü saka alima nung aliba nüburtem nem ali temu tajungba kumdaktsüsü asoshi maparen balala inyakdaktsür.

Iba sentong ya SDO (SC) Office, Chiephobozou nung agia liasü, kong anasa aliba yimtsüngtem nungi tetsür aluyimer aser SHG züngsemtem dena nisung 80 shi arua shilem agia liasü.

Iba sentong nung "Soil and Water, a Source of Life" omen dak ajemdaker Rongsenlemzung, Joint Director ajanga ali temu indang jembi.

Ali agi asenok takum

lidaktsür, anungji soil health angatetsü kanga tongtipang lir. Asen takum, asen chiyongtsü, aser tarutsü tia ajunga iba senti rongsen nung metaloka lir. Ajisüaka meimchir temi tapi agi inyaksangshiba ajanga ali temu samadaktsür, ta pai ashi.

Arem chidokba, aluyimba yimya meshidak amshiba aser tzü-mopung menenba ajanga asen aliba tamekdak dak raksatsür. Tsünütsü tali adokdaktsüsü mechi ali tendangtsü kanga tongtipang, ta ashi.

Kasa sentong nung Addl. Director & HOD, L. Chubaonen-i o tatsüka jembidang, pei peria aser poksünga aluyimtsü atema ali temu aser tzü kanga junga anepalutsüla, ta ashi.

Chiyongtsü angutsü ya ali temu dak keta lir, aser ali ajungnung dang nisung aser shiruru asoshi chiyongtsü tajung adokdaktsür, ta pai ashi.

Department ajanga Sub-Division nung maparen balala inyakba aser terenlok inyakyim ajak nung SDO (SC) office ajanga shilem agiba atema Alemyapang Longchar, NCS, ADC, Chiephobozou ajanga pelaba lemsatepa liasü.

Pai aluyimer tem dang training aser inyakyim balala nung department den amalitep akatsü aser pei rongsenketzung jenjang ajungkettüsü asoshi teyari agitsü ajungshia liasü.

Aluyimer tenung nung Keneingulie Miario-i department dang pelaba lemsatepa liasü.

Tarutsü anogotem nunga inyakyim balala nung department den amalitep akatsü imla atar, ta pai ashi.

Iba sentong tembangba sülen ali temu tendangba aser ali temu ketdangsuba nung temolung agütsüdaktsüsü mechi Mobile Soil Testing Laboratory nung ali temu tendanga liasü.

Iba sentong nung menden ya Litemo Murry, Joint Director liasü, Z. Casavi-i sentong tenzuka sarasadem aser Renthunglo Tungoe SDO(SC), Chiephobozou ajanga melepzung o jembia liasü.

December 5, 2023 anepdang iba anogomung bilemteta Advisor, Soil & Water Conservation and IPR, Imkong L Imchen'er kidang Commissioner & Secretary, Soil & Water Conservation, Joint Secretary aser Directorate officers tem lia sentong tatsüka agia liasü.



Mokokchung District Congress Committee tir, Watimongba Aier-i Ungma yimdak 26 Aonglenden ACCC kimen lapokba tamaitüsü Indian National Congress wako atsüketer sentong nung adenertem külemi tangokba noksa nung angur. Mokokchung, 5th December, 2023

Dimapur, Luchii/December 05 (TYO): Mokokchung Municipal Council ajanga Seasonal Club den lungjemer 50 buba Inter-ward Christmas Cake Race sentong December 23, 2023 nü ayongzüksü, ta December 5, 2023 nü sangdong ka ajanga ashi. Iba sentong ya anepdang 7:00 ako nung Main Police Point, Mokokchung nung tenzüksü.

Iba asemtemba tembangba sülen "The Visit of the Three Magi" omen nung ajemdaker Fancy Dress Competition alitsü.

Item tetoktepba nung ward ajungai shilem agia tepela aser tesunep tanüla agizüksü ayongzuka liasü.

Inter-ward Christmas Cake Race ya Mokokchung municipality kübok ward balala nung alirtem kisung atema alitsü. Shilem agiba team shia tetsür ana aser tebur nisung toku, tasemer ajak agi nisung 11 alitsüla.

Position 1 & 2 nung aliba tasemer ya tetsürtem asütsüla. Iba asemtemba nung shilem agitsüpur tenüngtem ya Ward ketdangsur temi meyongnem agütsür December 20, 2023 nü tashinung Technical Committee nem agütsüsüla, ta sangdong ajanga ashi.

Shilem agitsüpur ajak anepdang 6:30 ako nung Main Police Point atongtsüla. Iba asemtepba nung sepai aser uniformed personnel tem shilem magidaktsüsü. Receiving partners temi lanes alema aoba aser batons mereploktsüba asoshi disqualification alitsü.

Draw-of-Lot ajanga chest number lemsatsü aser 1st, 2nd aser 3rd jenjang angur nem cakes den kulüzüng kaket agütsüsü aser shilem agiba team ajak nem consolation prizes ama cakes agütsüsü, ta ashi.

Mangatetep kar adokra, iba sentong ayongzükur temi telemteba agitsü aser aji tatem asütsü.

Iba dak sendakba nung metetpelatsü asoshi Rongsentoshi, Convenor Technical Committee - Contact: 8798437988 aser Sentiapang, Member, Technical Committee - Contact: 8787882791 nunger den tongteprateptsü akok.

Fancy Dress Competition ya Mokokchung municipality kübok ward balala nung alirtem atema kisung alitsü.

Team shia presentation agütsüsü atema minute asem tashi agütsüsü. Team shia nungi shilem agir temi competition mapang Main Police Point khen alongtsü. Shilem agiba team ajaki yimya balala agi shilem agitsü ayongzükur, ta sangdong ajangasa ashi.

Iba tetoktepba nung shilem agitsüpur tenüngtem ya Ward ketdangsur temi meyongnem agütsür December 20, 2023 nü Programme Committee nem agütsüsüla.

Shilem agitsüpur ajak anepdang 6:30 ako nung Main Police Point atongtsüla.

Draw-of-Lot ajanga serial number jangatsü aser 1st, 2nd aser 3rd jenjang angur nem cakes den kulüzüng kaket agütsüsü aser shilem agiba team ajak nem consolation prizes ama cakes agütsüsü.

Mangatetep kar adokra, iba sentong ayongzükur temi telemteba agitsü aser aji tatem asütsü.

Iba tetoktepba atema metetpelatsü asoshi Lanuakum, Convenor, Programme Committee - Contact: 9436006431 aser Purtula, Member, Programme Committee - Contact: 8787627234 nunger den tongteprateptsü akok, ta sangdong ajanga ashi.

Kohima nung Indigenous games ayongzük



Dimapur, Luchii/December 05 (TYO): Hornbill Festival 2023 nung shilem ka ama Tribal Affairs Department, Government of Nagaland ajanga December 5, 2023 nü NSF Solidarity Park, Kohima nung indigenous games tetoktepba balala ayongzuka liasü. Iba tetoktepba nung takok angurtem yamai alitsü:

Spear Throwing Competition:

* 1st Prize: Peuhaulungsing (Zeliang kin) - 5 points

* 2nd Prize: Wuatisie (Sumi kin) - 4 points
* 3rd Prize: Yemlong Chaba (Chang kin) - 3 points.

Tribal Go-Carting Competition:

* 1st Prize: Konyak kin
* 2nd Prize: Ao kin
* 3rd Prize: Zeliang kin

Log Cutting Competition:

* 1st Prize: Rukoheituo (Angami kin)
* 2nd Prize: Hukuto (Sumi kin)
* 3rd Prize: Namyiteulung (Zeliang kin)

India-i Kenya nem USD million 250 agütsütsü



PM Modi aser Kenya tir, William Samoei Ruto na December 5 nü Hyderabad house, New Delhi nung tenangzüktepa tem melentepba mapang tangokba noksa nung angur.

New Delhi, Luchii/December 5 (Agencies): Ato Kilonser Narendra Modi-i Mongolbarnü sangdong ka ajanga, India-i agriculture sector modernization atem Kenya nem USD million 250 agütsütsü asoshi telemtetba agiba sangdongogo. Kenya tir William Samoei Ruto den onük aika benoka sensak asemba sülen iba telemtetba ya agia liasü. Ruto anogo asem atema India-i

Hombarnü arua lir. Linük ana tsüingda tesendaktep atsülangshitsü nükjidong nung pa India-i arua lir. India indang foreign policy nung kanga tongtibangsa Africa linüktem atema inyaka arudar aser taoba küm 10 tsüingda iba continent den mission mode nung tesendaktep atsülanga arudar, ta sensaksem tembangba sülen Modi-i osangbenertem den sensaksemba mapang

ashi. "Tir Ruto-i India semdangba ajanga linük ana tsüingda tesendaktep akangshiba dang masü saka iba ajanga Africa den linük tesendaktep jenjang tasen ka dangi ajungkettsü," ta Modi-i shisem. Ato Kilonser-i ashiba agi, India-i Kenya nung agriculture sector modernization atema USD million 250 aputsütsü. Indo-Pacific indang jembiba mapang Modi-i, iba tesem temeket nung India aser Kenya na tesendaktep tajungba akümba ajanga ajak renlokyonga aotsü, ta ashi.

India aser Kenya napronglai alima nung tang ajak dang tetsükdaktsü tulutibaji kiralongrartem ya lir ta agizüka lir ta pai ashiba den linük anapronglai counter-terror cooperation tali ajungkettsü asoshi telemtetba agiogo, ta shisem. Ato Kilonser-i ashiba agi, linük anapronglai India-Kenya economic cooperation takokba tashi ajungkettsü atema maongka tasen bushilokyonga aotsü.

INDIA bloc senden December 6 nü agitsü aliba thinener

New Delhi, Luchii/December 5 (Agencies): Opposition bloc, Indian National Developmental Inclusive Alliance (INDIA) senden ka Bodhbarnü Delhi nung agitsü, ajisüaka Parliament züingsem senden dang asütsü. Congress Working Committee züingsem Gurdeep Singh Sappal-i ashiba agi, atemteter aliba ama Opposition alliance co-ordination senden amentsü, kong party balala nungi MP tem den 2024 Lok Sabha election atema tasa balala aser menden kodang lemdangtsü iba indang sensak asemtsü imlar. Ajisüaka party tekolaktem sendenbo December ita tasembuba hopta nungang ayongzüka amentsü.

December 6 nü senden ya Delhi nung Congress tir Mallikarjun Kharge'er kidang amentsü, kong züingsem 28 pronglai 2024 küm Lok Sabha election nung BJP den tokteptsü asoshi sentong balala yanglutsü. Iba senden nung tongtibangsa menden lemdangtsüba indang sensak asemtsü imlar. West Bengal chief minister Mamata Banerjee, Jharkhand

CM Hemant Soren aser taoba Uttar Pradesh CM Akhilesh Yadav nungeri iba senden nung shilem magitsü atema telemtetba agia liasü. Item lenirtem yagi ashiba agi, parnok iba anogo jelia sentong yanglur lir. Kasa mapang nung Bengal CM-i ashiba agi, senden amentsüba indang la nem jelia memetdaktüsü. "Kü nem jelia osang magitsü, ibayongji ni North Bengal nung sentong kar yangluogo. Kü nem osang agütsü asübo ni item sentongtem anogo melenshir lila. Onok senden nung denla saka osang kecha mangazük," ta Banerjee-i osangbenertem den sensaksemba mapang ashi.

Lenirtem rongnung ano Tamil Nadu CM MK Stalin-ia shilem magitsü, ta ANI-i ashi. Bihar CM Nitish Kumar-a temang manemba ajanga senden nung shilem magitetsü. INDIA bloc pur tang tashi nung senden asemben mener lir. Mezüingbuba senden Patna nung June ita 23 nü, tanabuba Bengaluru nung July 17-18 nü aser Mumbai nung August 31 aser September 1 nü senden menogo.

Terenlok nüngdaker saka tekümzükba tama: Pushkar Singh

New Delhi, Luchii/December 5 (Agencies): Uttarakhand Chief Minister Pushkar Singh Dham-i Mongolbarnü NDTV dang ashiba agi, state nung development model ya tzü mopung temulungdang yur yanglutsü. "Onoki tzü mopung meraksadaktüsü industry tem bendenloktüsü ayongzükter," ta pai ashi. State nung tang yanglua aliba tunnel ka chirepba sülen anogo 41 lir pai iba olen lemsatepa liasü. Tunnel chirepba nung sabanger alirtem ya anogo 17 sülen kümzükba liasü.



Iba tunnel ya Char Dham lenmang nung shilem ka lir asünung, iba ya chirepba dak sendakba nung lenla balala nungi state aitsüogo. Aikati security jenjang shitak magiba ajanga iba ya ataloka liasü ta shiogo. CM-isa Ato Kilonser Narendra Modi nem tenüngsang agüja liasü. "Ni

Tsüingrem aser Ato Kilonser-i inyakyim indang maneni asüingdangba atema tenüngsang agütsür. Pai onok dang lenmang sayuogo. Onoki nüngdakba machine ajak angutsütsüsa pai teyari agütsüogo. Ibayongji onoki takok ngutetogo," ta pai ashi. Kasa mapang nung state terenlok asoshi sentong balala yangluba nung wifi sen dalang agi agütsütsüba aser infrastructure terenlok densema lir, ta pai ashi.

"Onoki idaki wifi jenjang dalang agi agütsür. Lenmang aser expressway tem yangludar. 2024 küm nungibo Delhi nungi Dehradun tashi lenmang renemtsü aser tesem ana tsüingda senzusenpongtsü atema ghonda 2.5 dang agitsü. Air connectivity-ia tajungba kümogo. Tang Dehradun-i tayimtsü 40 shi arur. Onoki heliports tema yangludar," ta pai ashi.

Karni Sena tir Gogamedi khaset

New Delhi, Luchii/December 5 (Agencies): Right Wing telok Karni Sena tir Sukhdev Singh Gogamedi Mongolbarnü Jaipur nung mejangjaba nisungtemi khasetogo, ta news agency PTI sangdong ka ajanga metetdaktüsü. Iba tatalokba ya Jaipur yimti kübok Shyam Nagar tesem nung ataloka liasü. Osang ajanga ashiba agi, Gogamedi anenzüka aliba ki kati nisung pezü ai aser pa dak injang khalokja liasü. Iba lendong nung Gogamedi indang security personnel ka aser tangar ka yirua liasü," ta Rajasthan Director General of Police (DGP) Umesh Mishra-i ashi.



Jaipur Police Commissioner Biju George Joseph-i ashiba agi, Gogamedi ya nija mozüki kati aritepa anir ao ajisüaka pa kanga mejugi yirur liasü aser mozüki dang süatok. PTI den lemsatepba CCTV footage ajanga nisung anati

Gogamedi dak injang aika khaloktsüba aser nisung ka kishi nung ata aliba sayuogo. Iba tatalokba sülen Gogamedi süatok aser kasa mapang nung pa indang security personnel ka aser tangar nisung ka yirua liasü. Iba tatalokba sülen Karni Sena tekolakba pusemertemi state yimtiba nung longkak aitba sentong ka ayongzüka agia liasü. Taoba mapang Lawrence Bishnoi gang nungi Sampat Nehra-i Sukhdev Singh Gogamedi tepsettsü amokmerenogo. Pai iba amokmeren indang Jaipur police nem metetdaktüsüogo.

Taküm küm June ita Karni Sena züingsem ka Madhya Pradesh kübok Indore yimti nung pa indang gari nung khaseter liasü. PTI sangdong ka ajanga ashiba agi, arishi küm 27 tain Mohit Patel (Karni Sena working president) indang tasü mang Kanadiya police station kübok pa inda nng gari nung sür lia nguteta liasü. Pa dak point-blank range nungi teku nung injang ana khaloktsü ama reprangteter ta iba mapang Additional Commissioner of Police Jayant Rathore-i ashi.

Bank of Baroda **CIRCULAR ROAD BRANCH** **Kiojen ayoktsü atema Sale Notice**

Ground Floor, Faith Building, Near Kharmahal Traffic Point, Dimapur, Nagaland- 797112, Email: vjdima@bankofbaroda.co.in

APPENDIX-IV-A [See proviso to Rule 6 (2) & 8 (6)]

Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker E-Auction ajanga kiojen ayoktsü notice.

Public aser talisa sen apur (tem) aser Guarantor (tem) dang, tsüinglanglen shia aliba kiojen, koba Secured Creditor, Bank of Baroda, Circular Road Branch, Dimapur, Nagaland dang mortgaged/charged süa liasü, ibaji Authorised Officer of Bank of Baroda, Circular Road Branch, Dimapur, Nagaland, Secured Creditor-i agiadokogo aser tsüinglanglen shia aliba senotsü alangzüktsü atema iba kiojenji "Kong koma ali", "Koma lidir yamaji" aser "Yangji aliba ajak" ayoktsü. Sen apur/tem / Guarantor/tem / Secured Asset/tem / sentsüh / Reserve Price / e-Auction anogo aser mapang, EMD aser Bid Increase asüba senji tsüinglanglen shia lir:-

Status of Possession: Physical

Property Inspection anogo aser mapang: 18.12.2023 & 10:30 AM nungi 4:00 PM

Sentsüh ajak agi: 29.12.2021 anogo tashi nung Rs. 1,11,10,006.32 (Rupees One Crore Eleven Lakhs Ten Thousand Six and Palsa Thirty Two Only), iba dak alla sen tetemlok aser tanga charges adentsü.

Sl. No.	Name & address of Borrower/s / Gurantor	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.
1.	1. MR. CHINNY MAGH (BORROWER) House No.208, Industrial Village, Razhuphe, Dimapur, Nagaland State- 797112.	A land measuring 0B-1K-18L and building thereon situated at Padumpukhuri, Dimapur covered by Patna No.1202, Dag No.295/1671 standing in the name of Shri Chinny Magh, S/o Late Ashiwa Magh. Bounded by:- North: Plot of Lanu Ao, South: Approach Road, East: Plot of N. Konyak, West: Plot of Bohovi Awomi.	21.12.2023 1:00 pm to 3:00 pm	Rs. 42,75,000.00
	2. MRS. NAOMI MAGH (CO-BORROWER) House No.208, Industrial Village, Razhuphe, Dimapur, Nagaland State- 797112.			Rs. 4,27,500.00
	3. MR. SENILO MAGH (GUARANTOR) S/o Chinny Magh, H/No. 208, Industrial Village, Dimapur- 797112, Nagaland.			Rs. 50,000.00

Telatetbatem aser osang tejangja agüja aliba link nung angutsü <https://www.bankofbaroda.in/e-auction.htm> and <https://ibapi.in>

Date: 06.12.2023
Place: Dimapur

Authorised Officer
Bank of Baroda, Circular Road Branch



TIR YIMYIM YIMOBILEM (EDITORIAL)

DIMAPUR RASEMNÜ, DECEMBER (LUCHII) 06, 2023

Hornbill nung Army

Taküm küm Kisama nung Hornbill benjongmung nung Naga kin shia pei pei sobaliba ki kaka yanglua yangji kimen ser benjongtepba sentong nung Indian Army purtema kasasa Naga kin amaji Army ariju ka yanglua shilem agidaktsübaji, atangji, Naga Students' Federation aser Global Naga Forum nati ashi ama tejashitsüka aser temulung animesungzükteti bilemer. Aji Naga nung sobaliba aser yimten otsü dak mapet. Shitakba agibo army-ji nübortem kümzüksü purtem, anungji benjong mapanga aser akhi mapanga parnok alibaji nübortem asoshi akhüm aser mulung alemdak asütsüla. Aji oda, Nagaland nunga Indian army aser Assam Rifles purtemi nübortem asoshi mapa tajung inyakba angur. Talisa, nübortem ajungben lendongtsüdong ajurudang army aser Assam Rifles-temi yariba ajanga teyari anguba dang masü saka taküm kümzükba dena lir. Ajisüaka, Naga nungertem, shirnoki Naga yimten tensa tia tajung—majung aika ajangshidanga lir aser shinoki Naga yimten temeten indang angateta ali, parnok asoshi Indian army aser Assam Rifles purtem ya Naga nung reshikangshir aser mezügmeshirtem lir. Aji oda, Naga yimten tongpang nung küm 60, 70 tema nungi tang küm ana jakdang Oting nung atalokba tashi nung Indian army-temi inyakba mapatemji bilemdangra jepaka nüktzü malu Naga nungertem reshikangshiba otsütem aika bilemtettsü. Item otsütemji mangashi aser memeteter asoshi Indian army aser Assam Rifles purtemji Naga nung asoshi teyarir tembar tajung amai asütsü saka India nung sepaitemi yim aser alu dena rongdoktsür timtemdaktsüba otsütem meteter Naga nung asoshi India nung sepaitemi Naga nung asoshi tsükchirtem danga tamajungba lir. Item denji asenok kodaser pelateptettsü ? Atangji, tai adoktsüja nungdaktsü saka kodaser asen ki aser asen lu rongdoktsür asen tsüraburtem dak mapa tamajung inyaka mezügmeshiba purtem amadoktettsü ? Parnok denjibo asenok lempu mazüksü. Ano asenok dak nisung mulungjang maden kaji, küm ana jakdang kasa Hornbill benjong mapang nung Oting nung kecha tai maketba ayangertem mapa nungi pei kidangi shilangba mapang kaseter mang bener ajentsü merangba India nung sepaitem ka dak danga kecha temerenshia magütsü yur, kecha matalok ama takumbo Hornbill benjong nung parnoki kasetba aser yirutsüba Naga nungertem den külemi benjong amongbaji, India nung sepaitemi masü asenok Naga nungertem atema matumalem mapa ka asütsü. Shitakba agibo Naga nung benjong nung tangar kecha balaka kiojen dena yanglua yur amongtsü menügdaker, ajisüaka asenokbo India army nem dena ariju yangludaktsür asen kinunger tajung ka ama parnok den külemi amongbaji asenoki memetet ser asenoksasa asenok alima tsüngdang mashimalu sayua inyakba tamashi maka ka lir. Asenokbo sen ngura ojang; yimten aser lokti nung jenjang ka ngura teperi, asenoki asen tsürabur aser kinungertem taküm samaba to amadokogo. Iba jagi tangari asenok tali tali mezügmeshir. Asenok ya an amai dang, tang züker odaktsüba to jang tera paloktsüra amadoker ken tena meyipa arur. Naga nung kiojen aser alu rongdoktsür India sepaitem rongnung ka danga okadak nokdakdaksür aija merenshiba alima otsü nung mali. Oting nung Naga nung tai maketba zü tokshirtem rongnunga ka danga linük ozüngi aija merenshiba mali, parnok ajak pelapela dang alitsü südi. Joko, iba amaji mataloktsü atema asenoki asenok ya pei temeten metetba, pei lima meimba aser yimten angatetba senso kaka asütsüla. Shitakba senso katibo akok tashi pei yim aser alu rongdoktsürtem, pei tetsü aser teyi tenu kangshirtem aser pei tebu aser tedi tenu merenshirtem dak nungi teyari angutsü imlaabo benjong külemi mamongtsü. Atangji, kokra Indian army aser Assam Rifles-tem asoshi mapa tajung inyakdi, kechiyong tamajung melen tajung meyiptsütsübaji Laishiba tesayuba saka parnok den külemi sobaliba benjong munga pelateptsü aser teyari meshitsübajibo terben bilemdangtsüla.

OLEMSABANG

Temulunger Sepai

P. Renthly Jamir

(Maneni yashi adok nungi...)

Missouri well Kansas yimti Pastor Carlton Funderburke Pai 22-8-2020 tenla kidang pulpit nungi par arogo pur dang temeyong agi tulokja arogoi kü nem Movado watch ka malitsüteter nenoki jenjangji memetet ta rara. Iba watch ya U.S dollar 3000 jenjang lir. India sen 230000/- Yisu asoshi temulunger Sepai Kasa ano 2022 October nung Louisiana Pastor Charles I Southal III arogo sen dollar 889565 meshitaki amshiba tai nangzük aser bushitepa aonung dollar 900000 menoktsü adokba 8-5-2023 jaili küm 5 atema yok.

Asenokbo kecha masü ta nübanga yutsür . Tepo kümteper tagir ajungba tachir ajungba ta ashir. Ibai kechiba tuteta zülur ta süra Tzünglu marudang shi bushi ama Sepaitem kümdanga alitsü atema lir . Arogo aika nung teloki mulung lemteta tenla ki asütsü committee shimtsüba arogo rest house asütsü, fellowship tenla ki benjar tasen asütsü luden balala shimtsüba yamala nung aiben temaibo matoker telung nungbo mokozü alonger ta angashir. Yabo lokti temelaba magiyonga tasür Dikontemi tashi tali amshiba, ya atemabo Dikon board dang masüngdangyonga ta yinjong dismantle, tokta tejen lema agiba ano oset aliba nung cash memo tai amshiba Dikon karbo sen lakh ana asem temenoktsü adokba otsüa lir. North India arogo indang oset yoka achiba Bishop Peter Baldev aser pa den pongsemer parnok nisung 16 sen 10,000 nisung shia agiba 15-7-2019 court nung case agütsüba osang kakat nung liasü. Tang Aor Pentecostal tamanger telok yutsür Baptist telok aser Revival telok arogo tentet Paika lir . ABAM kübok Ao arogo ajak agi 167 lir. Ano tenüng junga mejetetba fellowship arogo 13 lir. . Baptist arogopur pastor 180 lir. Ano Aor revival arogo 14 lir. Tang Aor Baptist aser Revival arogo ajak meyokteper pastor 194 lir . Ano yangji pei arogo saseb nung fellowship pastor aika lir . Sepai kaji pa training agidangyongi tepok azüoker taküm azüoker. Aji oda Yisu asoshi temulunger Sepai inyaktsü theology azünger Mizo nung Sang Niam Thanga indang osang kakat nung yamai angu. Student of Theology finds his calling in drug trade . Pa tajaba mim mozü shishiba nung angu. Pa divinity azünger saka Myanmar nungi Shillong O Calcutta tsüngda drug chia shibelena ayokba apu. Ano theology student Yilobemo Mozhui Dimapur nung Küm 17 Tain tetsür ka tepsetba atema apuba ajaki meteta lir . Asenok Aor Lanur Youth Director kati nashi chanu ka atema tangar dang sen 5000 achiba otsüa asenoki jembir.

Alima rangben nung Yisu Asoshi Temulunger Sepai tasü ait mait tendangtsü Tsungremi 2020 küm alimai Covid-19 wara yok . Aser temulunger Sepai ajaki Covid -19 tashiji Yisu dang tashi tuluba ta bilema Covid wara tsüngdang aputaka pai ashiba anga. Covid ozüng agi tenlaki ajak shibang pastortem aikati Joko tenlaki memenungrai aküm. Iba wara ya Tanzania tamangertemi dang Yisu dang nungi tashi tilaba ta noktak. Tanzania president H.E Magufuli tamangertem dang tenla ki

meshibangtsü ashi . Pai ashi Covid ya asenok anema mojing mapa ka lir aser iba anema raratettsüba tesemji tenla ki dang lir. Corona virus is a devil tool against us and the only place to fight it is Church. Ano pai ashi Tamang dang amangang asen Tsüngremji Covid dang tashi tuluba.

Iba wara yagi temulung lemteter sepaitem ajak tasü pelet ajaki tasütsü tsübu tongpang tamakok angu. Arogopur temeim mokonga aküm. Shillong Bethany hospital Director Dr John L.Sailo Covid agi asü aser public-i pa tasü mang Shillong Jhalupara leper nung meremdaktsü nokdang tasütsü tsubuteper Joko taremdak maka par Farm house Nongpoh Dorbar nung arem. Paibo taküm Ali tashi nüburi jenti yaria kümzük. Ibai alima nung otsüsütsü ka liasü. Naga lima Ao lima ajunga nung menoknok Tulu anoktsü ta olulu jembi Jorhat nung aliba machine agi buteter ta tsübutep.

Menoknok nungi kümzük alitsü government i training tapu tapu agütsür ki ojen ajak tip tema ayur ta inyaktep. Onok town nung tamanger tajung ka iba menoknok anokdang mener enzütsü atema kenü par kima compound nung sozülangben ka yanglua alidang yimersa nisung tain Pentecost amanger ka aru. Iba yanglubaji ngur "oko nai ya tashi amangtet" ta ashiba bilemteter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Plateau state, Nigeria nung tamanger tenet tepset

Abuja, Luchii/December 05 (Agencies): Fulani shiruru metsürtem aser danga kiralongrar temi November 30 nü Plateau state, Nigeria nung yimtsüing ana amakdang Khristanpur tenet tepset, ta osangtem ajanga ashir.

Lendong agütsürtem yagi anepdang 1:00 ako meta Mangu County kübok Puka aser Dinter yimtsüingtem amak, ta Puka nungi Yohanna Markus-i ashi.

"Fulani shiruru metsürtem den ano nisung telok kati onok aliba Puka aser Dinter yimtsüing amak aser yangji parnoki tamanger tenet tepset. Tebur pongu aser tetsür ka densema nisung tenet tepsetba den ano tamanger aika yirua tang mozüki nung prangbong agi akhaba aser nok agi alepba zübu anepalutar," ta Markus-i Morning Star News dang ashi.

November 29 ayatirm sülen pastor ka aser tamanger ana Khristanpur aliba Raddi village, Bassa County nungi pua bener ao, ta yangji alirtemi ashir.

"Bodhbarnep 12:30 ako meta bandits temi onok aliba Raddi yimtsüing amak aser Khristanpur asem pua bener ao. Kiralongrar temi pua bener aoba Khristanpur ya arishi küm 50 tain Pastor Bala, arishi küm 50 tain Keziya Ayuba aser arishi küm 40 tain Sunday Ayuba alitsü.

Toro County nungi nisung kar pua bener aotsü merangba asoshi police temi meita aoba mapang par asem ya nokongdang kumzük, ta osang

ka ajanga ashi.

November 15 nü Bokkos County kübok Bokkos jila tezülen Hilltop nung tamanger ka tepset, ta yangji alir Timothy Joseph-i ashi.

"Nikongdang 7:00 ako meta shiruru metsüba Fulani nisungtemi Bokkos nung aliba Hilltop tesem amak aser tamanger ka tepset. Kasa lendong nung tamanger ka yiru," ta Joseph-i ashi.

Bodhbarnü aser Brehostibarnü lendong atalokba indang Morning Star News ajanga asüingdang dang, Plateau State Police Command odongtar Alfred Alabo-i ashiba agi, police dangi iba osang aruogo aser lendong ajurua aliba tesemtem nung ketdangsür aser mitkartem yoka lir.

2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashi.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaksüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang

nung lir.

2023 World Watch List ajanga alima nung Khristanpur alitsü tamajungtiba linüktem asadanga rongnung Nigeria ya jenjang trok buba nung lir, koba taoba küm jenjang tenet buba nung liasü.

"Fulani, Boko Haram, Islamic State West Africa Province (ISWAP) aser danga telungpur temi Khristanpur aliba tesem meita aor, tepseter, tashiyim amshia shi nung medemer, sen meshitsü mesüra alar ama ayutsü asoshi pua bener aor," ta World Watch List ajanga ashir.

"Fulani, Boko Haram, Islamic State West Africa Province (ISWAP) aser danga kiralongrar temi Khristanpur aliba tesemtem maka tamangertem tepseter, tashiyim agi shi nung medemer, pua bener aor," ta WWL ajanga ashi.

"Taküma linük south tsütsü Khristanpur timba aliba tesemtem nung tali azüdokshir.... Nigeria sorkari ibai tamangba yimsü tsütsü reshikangshiba masü ta maneni ashir, anungji Khristanpur temeden anema inyakba memerenshi yutsür."

Nigeria aser Sahel tsütsü Muslim Fulani nisung million aika lir aser parnok dak 'extremist views' mali saka Fulani kari radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 osang ka nung ashi.

ANO GO ABEN TSÜNGREM DEN

AWASHI

Yisui nutsüingtem dang ashi, "kecha mesamatsüsa tanüingba tanük-tariji bendenang" Yohan 6: 12

Ni lanuwa college nung azüingdang tasen oli asü nung hostel nung chiyongtsuji kanga tezü atang. Anungji ozü tesayur ka kidang anogo asem jika college mess hall - i chiyongi moi toktsü. Kodang notice board nung kü tenung anogo asem mechiyongba atema fine Rs.25 per plate ta zülur Rs.150 ta zülur angu, ni kanga aoksa. Kü auso mechiyongi doktsüba to ni lalushiponger ka liasü. Chijang ka ta nai meyanglur ta zülur angu. Ni asoshi lesson tulu ka liasü.

Asenok iba alima nung chiyongtsü nungi tenzüker maparen kechi sarina ajak ya awashi, kümdanga kudang asütsü kibubai laishiba nung tesayuba jung junga shia lir. Nutsüingtem tebok sunga chia jemer tatem ta toktsüba masü saka tanük tariji bendangang ta shia lir tetezü lalushipongbaji majung ta sayur. Lokti nung atendang arutettsü, marutettsü item kudangsürnem metetdaksünung junger. Ano agizüka chia ajem dang na aser ni peri dang agizüknunga kanga tajung asütsü.

SARASADEM:

Ketdangsür shia den tim yim agi lia anidaker ka ni-a sudakjangma Amen.

Daddy Yankee-i reggaeton yutsür Khristan yimsü asoshi inyaktsü



Daddy Yankee

Coliseo de Puerto Rico, Luchii/December 05 (Agencies): Daddy Yankee-i pa takum tamangba yimsü asoshi bendanga inyaktsü mechi reggaeton nungi anisüingzüker, ta pa tatembang buba ken tena jajaba La Meta (The Goal) tatemi Honibar aonung ashi.

Arishi küm 46 tain kentener-i "Gasolina" ken atenba sülen iba osang ya

sangdonga liasü. 2004 küm pai iba ken ya atenba ajanga alimai pa meteta akum.

"Kü nüburtem, ni asoshi iba anogo ya kü takum nung tongtipangtiba anogo lir. Aser ni ibai nenok den lemsatepner, kechiaser takok anguba takum ka alitsü ya nükjidong aliba takum ka ama aliba den kasa masü," ta 2017 küm Luis Fonsi den "Despacito" ken atensangi Spanish oshi nung ashi.

Alima ajunga sema jajaka, award balala ngutetaka aser alima ajunga nung fans temi tenüingsang agüjaka mapang talangka nungi pa temolung nung anisüingzüker ka meliasü, ta Coliseo de Puerto Rico nung nisung 18,000 dak tema adenshia alidak ashi. "Item anogo du süyitemogo. Iba tazüing ya nisung kari süngtsüogo," ta pai ashi.

Alima tesem balala nungi

pa livestream ajanga repranga lia pai iba osang sangoktsüdang pa tenük nungi nüktzü alua liasü.

Daddy Yankee-i Spanish oshi nung Laishiba tekong ka agiteta, "Nisungi alima ajunga ajangzüktetaka pa tanüla senzüka yutsüra kechi tajung ali?" ta ashi.

"Iba yongji taonung ni angateter aser küden Yisu lir ta alima ajunga dang ashitsü ni maker aser ni Pa den alitsü," ta pai teka anüinglen makanger ashi.

Pa asodang ajaba tenüing, Ramon Ayala ama takum tasen tenzüktsü, ta Daddy Yankee-i sangdong.

"Ken, social networks, platforms, microphone ka amala kü ket nung aliba hadir ajak Yisu-i künem agütsü aser item ajak ya Pa yimli asoshi lir," ta pai ashi.

"Puerto Rico, ni kanga pelar, aser ni takum tasen tenzükbaba nung nenok kü den jajatsü imlar."

"Kü sülen anidaker ajak dang ya shiner, Yisu Khrista sülen anidakang, shiba lenmang, ochi aser takum lir," ta ashi.

"Yisu ama, pa taochi agi ni alima ajunga sema jajaogo, nü

taochi nung, Oba Puerto Rico nungi ni alima dang nü osang sangdongtsü nai melatsü imlar. Amen." Ta Daddy Yankee-i ashi.

Iba sentong atemba sülen Coliseo de Puerto Rico tezülen anüing nung drones aika nungi kangki amai tesangwa agi yanglua "Cristo viene" (Yisu arutsü) ta sayua liasü.

Pai taoba mapanga Khrista dak amangba indang nüburtem den jembia liasü, saka Deobar aonung sangdongba yagi nüburtem aoksa.

Social media nung fans temi pelashishia agizük.

"Ni asoshi kentener tajungbaji na ta shiba nung ni aibelenba meliasü," ta nisung kati Daddy Yankee indang Instagram post nung ashi.

"Ni na meimer aser teti meimtsü," ta ano fan kati langzü.

Saka nisung karibo pa atala menüja liasü.

Reggaeton artist temi pei wadang yutsür Khrista nem bendanga agütsür Daddy Yankee ya mezüing masü. Puerto Rico nungi Farruko, Héctor "El Father" aser Voltio nungeria pei wadang (kentenba) yutsür Khrista tenzüker.

**AO OSHI ANGAZÜKDAK:
TANÜ ANGAZÜKTSÜBA OJANG**



Senso

(n) Lisopur, pei alidak yimten temeten akaba nisung (citizen)

* Asen lima asoshi senso ajaki ochishia inyaktsüla.

Sentak

(v) jenjang latet (pricing)

* Onoki ak ka kiburi sentak atakba shitak agütsür ali.

OLONG PAITEP # 6635

	1			2	3				
4			5						6
					7				
	8								
	9		10			11			
					12				13
14									
					15				

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsungda jatepba - (4)

OLONG PAITEP # 6634 TELANGZÜBA

TIPIEN :

- 1. Menungra, 6. Orak,
- 7. Mimong, 8. Aika, 11. Rata,
- 14. Tiyazü, 16. Anembong.

LANGTSÜNGLEN :

- 1. Medemer, 2. Nusem, 3. Nisung,
- 4. Aoksa, 5. Tapok, 9. Azüpong,
- 10. Timtem, 12. Aginü, 13. Anema,
- 15. Apuso.

NAI-A YA METETTER MA



Mizoram Assembly elections 2023 nung tang mezüng atema tetsür candidate aseme takok nguogo. Taküm election nung candidate ajak agi nisung 174 liasü aser iba nungi tetsür 16 dang densema liasü. Tetsür candidate tem rongnung Zoram People's Movement (ZPM) nungi Baryl Vannehsangi o Lalrinpuii aser Mizo National Front (MNF) nungi Prova Chakma nungeri takok ngua Member of the Legislative Assembly (MLA) kümogo. Lalrinpuii-i Lunglei East constituency, television presenter Baryl Vannehsangi-i Aizawl South-3 constituency aser Pravo Chakma-i West Tuipui constituency nungi takok angu.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Zoramthanga-i Mizo National Front president toktsür



Zoramthanga-i Mizoram Governor Hari Babu Kambhampati den ajurutepdang agiba noksa angur.

Aizawl, December 5, 2023

(Agencies): Mizo National Front (MNF) party president aser Mizoram Chief Minister Zoramthanga-i tanü mapa nungi anenba shidi agütsüogo.

Zoramthanga-i MNF vice president aser Deputy Chief Minister Tawnluia nem resignation letter agütsü. Hombarnü results adokba sülen Zoramthanga-i

nikongdang Mizoram Governor Hari Babu Kambhampati nem CM menden nungi anenba shidi agüja liasü.

Taküm Mizoram assembly elections nung MNF-i tamakok anguba atema pai tebilemstü khuret bena mapa nungi anenogo.

Aizawl East 1 constituency nung Zoram People's Movement (ZPM) Vice President Lalthansanga-i Zoramthanga madak takok ngua liasü.

Züngsem 40 agi akümba assembly nung MNF-i menden 10 nung dang takok ngutet aser ZPM-i menden 27 nung takok angu.

Tanü nungi Guwahati Film Festival tenzüksü

Guwahati, December 5, 2023

(Agencies): December 6 nungi 16 buba International Guwahati Film Festival tenzüksü.

Iba benjung ya District Library auditorium, Guwahati nung alitsü aser linük 9 nungi movie 17 tashi sayutsü.

“Anogo pungunü benjungmong nung Hungary, Poland Germany, France, Sri Lanka, Egypt, Portugal, Bangladesh aser India nungi

movie sayutsü” Guwahati Cine Club secretary Madhurima Baruah-i ashi.

Bodbar nikongdang 5:00 ako nung Assistant High Commissioner of Bangladesh Ruhul Amin-i benjung lapoktsütsü ta lai ashi.

Iba benjung nung Assamese filmmaker Mridul Gupta-i yangluba Karbi oshi film “Meerbin” mezüng sayutsü. Maneni, Great Masters

category nung Hungarian filmmaker Miklós indang film 3 aser Polish filmmaker Krzysztof Kieslowski indang movie 3 sayutsü.

Iba benjung nungsa Assamese filmmaker Brajen Baruah'er film Lalita aser actor Debanand-i shilem agiba Guide film sayutsü.

Benjung lapokba sentong nungsa Guwahati Cine club indang kaket Chitra Chinta sayatsü.

APSC ken o atema SIT-i APS ketdangsür 3 jaoker

Guwahati, December 5, 2023

(Agencies): Special Investigation Team (SIT) Assam Police-i APSC sen yong mapa yokdokba ken o dak sendakba atema ketdangsür asem jaokogo.

APS ketdangsürtem- Faruk Ahmed, Dipankar Dutta Lahkar aser Ashima Kalita nunger dang

December 7 nü CID headquarters, Guwahati nung SIT tsüngdangi arutsü tetuyuba agütsüogo.

Hombarnü ADCP Sukanya Das apuba sülen APS ketdangsür asem jaok. Das ya anogo pungunü atema police ket nung ayutsü temelaba agütsüogo.

APSC sen yong mapa ayokba dak sendakba nung ketdangsür 21 tashi mapa nungi anentsüogo.

Parnokji Assam Police Service (APS) 11, Assam Civil Service (ASC) 4, Excise Inspector 1, ARCS officer 1 aser Assistant Employment Officers 3 lir.

24TH Hornbill Festival 2023

DAY 6

MORNING - 10:00 AM

HOST
MRS. SALHOUTUONO KRUSE
MINISTER
WOMAN RESOURCE DEVELOPMENT & HORTICULTURE

CO-HOST
MR. SETHRONGKYU
ADVISOR, INFORMATION TECHNOLOGY & COMMUNICATION,
ECONOMICS & STATISTICS & EVALUATION

MR. Y. LIMA ONEN CHANG
MLA

CHIEF GUEST
HE HIROSHI SUZUKI
AMBASSADOR OF JAPAN

TRIBAL GUEST
R. THECHAMO OVUNG
LOTHA

AFTERNOON - 1:00 PM

HOST
MR. P. BASHANGMONGBA CHANG
MINISTER, HOUSING & MECHANICAL ENGINEERING

CO HOST
MR. T.N.MANNEN
ADVISOR, LAW & JUSTICE & LAND REVENUE

DR. SUKHATO A. SEMA
MLA

CHIEF GUEST
SMT BANDHANA DEORI IRS
CHIEF COMMISSIONER GST & CUSTOMS
(NORTH EAST REGION)

SCAN FOR HORNBILL SCHEDULE

Nigeria military-i aibelena civilian 85 tepset

Abuja, Luchii/December 5 (Agencies): Nigeria military-i telungpurtem amaksü asoshi drone amshi, ajisüaka aibelena civilian 85 tepset, shirnok tamangba yimsü dak sendakba nung benjung ka atema adenshir liasü, ta ketdangsürtemi Hombarnü metetdaksü.

Nigeria kübok mepetmesü adoker aliba tesem nung tang tesüsa military-i civilian tem dak bomb pokloktsüogo. 2014 küm February ita Nigeria military tayimtsü kati Borno state kübok Daglun nung bomb pokloktsüba sülen civilian 20 tepset aser 2022 küma September ita nisung aliba tesem nung 14 ben tashi bomb pokloktsüba mangaoka lir.

Kaduna state nung Igabi council area kübok Tudun Biri yimtsü nung Deobar aonung Prophet Muhammad asoba anogomung amungtsü atema Muslim nungertem adenshir aliba mapang iba bomb poklokja liasü. Kaduna Governor Uba Sani-i ashiba agi, "kiralongrar aser bandits" tem dak rangloker drone ka amshia amakba mapang civilian tem ya aibelena tepset aser ano aika yiruja liasü.

National Emergency Management Agency-i Mongolbarnü sangdong ka ajanga ashiba agi, tang tashi nung tasü mang 85 bo remogo aser ano maneni bushisüngdangdar.

Kasa mapang nung Amnesty International indang Nigeria office-i iba tesem nung mapa inyaktertem aser volunteer temi agütsüba osang dak ajemdaker ashiba agi, iba tesem amakba mapang nisung 120 tepsetogo.

"Parnok rongnung aika tanurtem liasü aser ano tasü mang talila ngutetdar," ta Nigeria nung iba telok director Isa Sanusi-i Associated Press

dang ashi.

Igabi nung alir Mustapha Rufai-i ashiba agi tasü mang 50 bo ngutetogo. "Parnoki ashiba agi parnoki aibelena bomb pokloktsü," ta pai ashi.

Nigeria central aser northwest nung extremist aser ozü ng alema inyaksangshirtemi tesem balala maka kanga timtem agüja arudar. Linük sepaitemi item teloktem jenoka aliba tesemtem nung tayimtsü amshia bomb poklokja arudar saka khen khenbo aibelena yimdaklirtem dak bomb pokloktsür.

Bandits ta nungja agütsür teloktemi yimtsü ngtem amaker, air force fighter jet ka aser train ka makogo aser tanurtem densema sen meshitsü atema nisungtem aika pur aoer.

Deobarnü aibelena bomb pokloktsüba ajanga nüburtem kanga mepelateper aser iba ajanga Nigeria security force temi human rights anema i n y a k s a n g s h i b a bilemtetshidaksür, koba United States densema antiölen aliba allies temia ashishiogo.

Kaduna nung iba operations atema Nigerian army division in charge tekolakbai ashiba agi, Hombarnü drone operation benoka inyakra ya teti inyaksangshiba maparen ka liasü.

"Nigeria army-i kiralongrartem teti ama meita oa liasü ajisüaka tia maka iba ajanga nüburtem dak kongshiogo," ta army division tekolakba Major-General Valentine Okoro-i ashiba Kaduna State Ministry of Internal Security-i metetdaksü.

"Tekü mzüka maparen maneni benoka inyakra aser yirur alirtem temang anepalutsü atema mozüki-i anirogo," ta

Kaduna Security Commissioner Samuel Aruwan-i ashi.

Nigerian air force-i ashiba agi, parnoki Deobar aonung Kaduna nung meita aoba sentong kecha ayongzüka magi, saka iba tesem nung combat armed drones tem parnok kijai amshir masü, ta shisem. Nigeria army otongdar kati iba tatalokba dak sendakba nung osang agütsütsü mepeshiba magizüki liasü.

Local media sangdong balala ajanga ashiba agi, drone amshia ano amaksü akok ta tsüba bilema yimdaklirtem iba tesem nungi jenshia liasü. Activists temi ashiba agi, taoba mapang iba amala mesükba tatalokbatem bushisüngdang masü aser iba ajanga lendong nung akoksartem aser tekü mzükertem nem temenok aser ochi obendang magütsü aruogo.

State governor Sani-i ashiba agi, asür kinungertem den ajuruteptsü atema ketdangsürtem iba tesemi yokogo aser ken o bushisüngdangdar.

"Iba amala tatalokba tanaben matalokdaksütsü atema onok mulungteter lir aser kiralongrartem den raraba mapang nüburtem kümzüka toktsütsü asoshi tongtibangsa inyaksangshitsü ta tenangzüka agütsür," ta pai ashi.

kiralongrar inyakyim ka lir ta Telegram app ajanga ashi. "Parnoki nisung tepsetteter ta asüba yagi Russia nung lenirtem nema adanger," ta tir-i ashi. Kyiv ya Iran nung yangluba Shahed kamikaze drone tem amshia amak. Honibar anepdang zü ngia Kyiv kübok district balala amak tenzü k aser anü atokba sülen ano drone aika yoka maka liasü

Myanmar mitkar lenir Min Aungi yimtenren angatetteptsü ajungshir



Naypyidaw, Luchii/December 05 (Agencies): Myanmar linük ajungalen mitkartem den rara aliba telungpur telok balala dang mitkar lenir Min Aung Hlaing-i yimtenren angatetteptsü asoshi lenmang bushitsü ajungshi, shirnok dak China, India aser Thailand den arütsüa alilen nungi osangtsü sang agitema mitkar dak amaker.

2021 küm Nobel Peace Prize anung Aung San Suu Kyi-i aniba democratic sorkar atsü ngdokba sülen tawa amakba ya mitkar yimsüsür asoshi tetsükdaksü tulutiba lir ta dangar temi ashir.

"Telungpur telok balalai maneni tamachi mapa inyakra, parnok aliba region nung nüburtem tim atemtsü ta General Min Aung Hlaing-i tekum dangtsü shiogo. Anungji nüburtem takum apayua bilem tsüla, aser yimtenren tsütsü tebilem tsü angatetteptsü nü ngdaker," ta Global New Light of Myanmar dang pai ashi.

Myanmar nung kin tilatem nungi telungpur telok ter dak tema lir, aser Myanmar National Democratic Alliance Army (MNDA) i anir Three Brotherhood Alliance, Arakan Army (AA), Ta'ang National Liberation Army aser Loikaw Local People's Defence Force ama People's Defence Forces (PDFs) tem lungjemer north tsütsü Shan state ajungalen amaker, jila balala amokbanger aser China den arütsü tongtipang shishilempaba tesemtem rakzüker.

1948 küm Britain nungi nüchiso anguba sülen item telok yagi mitkartem den rara arur, saka tawa 'Operation 1027' aser 'Road to Naypyidaw' nungja

agütsür mitkartem den raraba ajanga China ama alima nung tashi tulu linüktemi yariba mitkar lenirtem takoksa jenti ajurua arur.

October ita nungi tenzüka mitkar aliba tesemtem amakdang tila tanur densema civilian 250 dak tema sür alitsü südi, ta United Nations field reports ajanga ashir.

Linük tesem balala nung nisung 500,000 dak tema pei ki yutsür jenshiogo, saka sorkar anemer temi nüburtem nem timtem agütsütsüsa mera kecha agia mali aser parnoki civilian tem kumzüka ayutsü nangzüka lir, ta ashir.

Kasa mapang National Unity Government nungi Zing Mar Aung-i ashiba agi, telok balalai meyiper amakba ajanga mitkartem tsübor.

"Mitkar lenirtem aser sepaitem temulung ajema kumogo, kechiaser parnoki yimsü asütsü tashi samar," ta Myanmar shadow government nung foreign minister Zin Mar Aung-i Nikkei Asia den jembidang ashi.

"Mitkar mapa yutsür jena arur aika onoki agizüker aser mitkar indang camp timba bendanga agütsüogo. Mitkartem par sasa anentsü. Parnok laotsü renema lir," ta lai ashi.

Hopta ishika tsü ngta ano amak tenzü ktsü. Saka ibai 'civil disobedience' yimya nung alitsü aser sorkar nem anasü nungi timtem agütsütsü, ta lai ashi.

"Onok mitkar ajunga anema nokdaker masü. Onoki mitkar tajungba kuma melentsü meranger. Onoki mitkar nung 'heroes' aser temelenshi arur nü ngdaker," ta Zin Mar Aung-i ashi.

Gaza mozüki sünga nüburtem tetsübo nung lir

Gaza City, Luchii/December 05 (Agencies): Gaza north tsütsü Kamal Adwan Hospital nung civilian tem tetsübo nung taolen lenmang makai lir aser Israel sepaitemi iba tesem ya lungbanga lir, ta Ministry of Health nungi ketdangsür kati ashi.

Iba mozüki anasa amakdang nisung 100 dak tema süogo, ta ministry ajanga Mongolbarnü ashi.

"Israeli occupation forces temi tesem ajaklen nungi mozüki amaker... Onok dak injang aser artillery shells khaloktsür," ta Gaza nung aliba Health Ministry indang director-general, Munir al-Bursh-i Kamal Adwan telung nungi ashi.

"Shirangertem, yirur alirtem aser mozüki nung jenoka alirtem tetsübo agi sünga lir," ta pai ashi.

Kamal Adwan nung tangokba video tem nung nisung tasü mang sü temesü ng agi aleper medical compound nung nangdena aliba nguogo. Iba

mozüki yutsür aotsü meranger ajak dak Israeli snipers agi akhar, ta tenük kuli alir kati ashi.

"al-Shifa Hospital aser Indonesian Hospital nung ama Kamal Adwan Hospital nung alir ajak tepsettsü tsübor," ta al-Bursh-i ashi.

Tanen makai bomb pokloktsüba mapang yirur alirtem mozüki telungi ait, aser kar tekolak aser tejak aoyi agi sünger liasü. Yangji jenoka alir nisung aika ali nung mejanger doctor temi anepalua liasü.

"Parnoki onok dak nungi kechi aginer? Parnoki onok tepsetatokogo. Kinungertem aser tembartem süogo," ta mozüki nungi nisung kati osangbener dang ashi.

October ita tiyonglen Israel sepaitemi alilen nungi makyonga arudang Gaza Strip north tsütsü aliba nisung million 1.1 dak tema dang south tsütsü aotsü totuyuba agüja liasü.

Tayimtsü amshia amakba

aser raraba hopta ka anena liasü aser iba mapang Hamas-i October 7 nü Israle amakdang pua bener aoba aser Israel-i tepuokdak yua aliba Palestine nung melentepa liasü. Ajisüaka Hokulbarnü nungi tenzüka maneni rarar.

Khen asoshi rara anena ataba mapang tembangba sülen Israel sepaitemi Gaza tesem ajungalen amak tenzüka south tsütsüa par operation ulushia liasü.

Israel mitkar temi Gaza amakba nung Palestine nung nisung 15,900 dak tema tepsetogo.

Hombarnü aonung nisung 158 asüba jangjaogo, ta Gaza indang Health Ministry ajanga ashi. Item rongnung nisung 108 dak tema Kamal Adwan Hospital anasa amakdang asü, Khan Yunis nung aliba Nasser hospital nung tasü mang 40 yua lir. Deobar aonung nisung 349 tepset, ta ministry ajanga ashi.


NATIONAL COUNCIL OF EDUCATIONAL RESEARCH AND TRAINING
 SRI AUROBINDO MARG, NEW DELHI-110 016


NCERT DOCTORAL FELLOWSHIPS – 2023

Education mesüra education den indang-indanga sendaktepa aliba danga discipline indang wadang nung NCERT Doctoral fellowships asoshi award atema application meshir. Application ya osang kakat nung iba advertisement adoker anogo 30 tashi agizü ktsü. Eligibility, procedure aser danga osangtsü sang tejangja atema NCERT indang website www.ncert.nic.in nung angutsü. Note: Ajak agi fellowship ter lir aser item rongnung fellowships pezü Regional Institutes of Education (RIEs) Ajmer, Bhopal, Bhubaneswar aser Mysore asoshi kaka (temsüa lira) wazüka lir.

CBC 21104/12/0015/2324

Hornbill Darts Masters ayongzüka asayaogo



Dimapur, Luchii/December 5 (TYO): Indian Darts Council National Ranking Event tawabanga kübok Fun Tree Crew (FTC) aser Nagaland sorkar na longjemer December 4 nü Angami Youth Organisation (AYO) Office nung 3buba Hornbill Darts Masters 2023 ayongzüka asayaogo.

Iba sentong nung Minister, Higher Education and Tourism, Temjen Imna Along tetushi tejaoker liasü.

Open singles category nung India nung temaba jenjang nung aliba asayar Nitin Kumar-i championship title aben aser Vikeheilie Suohu tanabuba jenjang nung liasü.

Tebur kija asaya Nitin Kumar-i akok aser pa sülen tanabuba jenjang nung Sangam Roy liasü.

Tetsür kija asaya Mahi Bosmia-i akok aser Kanika Jhahharia tanabuba jenjang nung liasü.

Draw Doubles category

nung Nitin Kumar aser Kezhabou Suohu na mezüngbuba aser Neibei Solo o Kelhousatuo Yiese na tanabuba jenjang nung liasü. Team event nung team 180 aser Team One Nagaland na mezüngbuba aser tanabuba jenjang nung liasü.

Iba tetoktepba atema ajak senteper senpet sen 5,50,000 agütsü. Asayamung nung Dubai, Malaysia aser India kübok tesem balala nungi densema asayar 60-i shilem agia liasü.

India den asayamung atema Temba Bavuma meshim



Luchii/December, 2023 (Agencies): Cricket World Cup nung junga masayatetba sülen India den white-ball asayamung asayatsü atema South Africa captain Temba Bavuma nem anisüngzük agütsütsü asoshi telemtetba agiogo.

Ajisüaka Bavuma shibai pa World Cup mapang temang kangabo manemi liasü ta shiogo, pa lenisüba nung December 26 nungi tenzüka asayatsü aliba Test asaya anabo asayatsü.

Bavuma maliba mapang Aiden Markram lenisüba nung South Africa team India den Twenty20 aser One Day International (ODI) asayatsü.

World Cup nung Bavuma-i jung masayatet aser asaya ti nung pai run 35 dang yanglua pa indang average 18.12 liasü. Ibayongji pa temang tajungba anepalua Test atema renemshitsü asoshi white-ball asayamung nungi anisüngzük

agütsüogo. Quinton de Kock, shiba World Cup tembangba sülen ODI asaya nungi anenogo, pa a T20 asayamung nungbo masayatetsü saka pa Australia nung asayaba Big Bash nungbo Melbourne Renegades nungi asayatsü.

Test team nung batter David Bedingham aser Tristan Stubbs na tang mezüngbuba team nung züngoksemogo.

Fast bowler Nandre Burger-a asayamung asemprongla atema shimogo.

Wicketkeeper-batter Kyle Verreynne aser all-rounder Wiaan Mulder nata ODI aser Test asaya atema shimogo.

Ajisüaka fast bowler Kagiso Rabada, domestic cricket nung shilem agitsü aser Test atema renemshitsü asoshi limited-overs nungbo masayadaksütsü.

Gerald Coetzee, Lungi Ngidi, aser Marco Jansen nungera Rabada ama ODI asayamung

atemabo anisüngzük agütsüogo.

India aser South Africa na December 10 nungi 14 tsüingda T20 asaya asem asaya-a tenzüksü aser iba sülen December 17 nungi 21 tsüingda ODI asem asayatsü.

Test asaya ya December 26 nü Pretoria nung tenzüksü aser tanabuba Test asaya ya Newlands, Cape Town nung asayatsü.

Asayamung atema South Africa team:

T20 squad: Aiden Markram (captain), Ottniel Baartman, Matthew Breetzke, Nandre Burger, Gerald Coetzee, Donovan Ferreira, Reeza Hendricks, Marco Jansen, Heinrich Klaasen, Keshav Maharaj, David Miller, Lungi Ngidi, Andile Phehlukwayo, Tabraiz Shamsi, Tristan Stubbs and Lizaad Williams.

ODI squad: Aiden Markram (captain), Ottniel Baartman, Nandre Burger, Tony de Zorzi, Reeza Hendricks, Heinrich Klaasen, Keshav Maharaj, Mhlahli Mpongwana, David Miller, Wiaan Mulder, Andile Phehlukwayo, Tabraiz Shamsi, Rassie van der Dussen, Kyle Verreynne and Lizaad Williams.

Test squad: Temba Bavuma (captain), David Bedingham, Nandre Burger, Gerald Coetzee, Tony de Zorzi, Dean Elgar, Marco Jansen, Keshav Maharaj, Aiden Markram, Wiaan Mulder, Lungi Ngidi, Keegan Petersen, Kagiso Rabada, Tristan Stubbs and Kyle Verreynne.

NA-i ayongzüka 3buba Great Hornbill Run sentong agiogo

Dimapur, Luchii/December 5 (TYO): Nagaland Athletics-i ayongzüka December 5 nü Indira Gandhi Stadium, Kohima nung 3buba Great Hornbill Run sentong yongzüka agiogo.

Iba asemtepba nung ajak senteper asayar 80-i shilem agi kong tebur 61 aser tetsür 19 densema liasü.

Asemtepba nung senior tetsür aser tebur aser U-16 & 18 (tetsür aser tebur) nem senpet agütsüba yanai alitsü:

1st - 15,000/-	1st - 10,000/-
2nd - 10,000/-	2nd - 7,000/-
3rd - 7,000/-	3rd - 5,000/-
4th - 5,000/-	4th - 3,000/-
5th - 3,000/-	5th - 2,000/-


Jude -i 2023 Golden Boy Award nguogo

Luchii/December 5, 2023 (Agencies): Real Madrid nungi asayar Bellingham-i vote 485 (shilem 97) ngua Golden Boy award nguogo. Pai lanur asayar tajungtem aika ajateta iba naroküm agizükogo.

Arishi küm 20 tain England aser Real Madrid nungi midfielder yagi Bayern Munich nungi Jamal Musiala, Barcelona nungi Alejandro Balde, RB Leipzig nungi Xavi Simons aser Benfica nungi Antonio Silva nunger ajateta iba naroküm nguogo. Pa ya iba naroküm agizükba Real Madrid nunger asayar mezüngbuba kümogo.

2021 küm pa Borussia Dortmund-i ao kong pai kanga junga asaya liasü. Iba sülen pa 2023 kübok Real Madrid-i ao aser pa ya England nunger asayatemrongnungi sen timtiba agi alizükba asayar aküm.

Real Madrid nung sen tasak agi alizüker aruba asayatem aika pressure balaka aliba



ajanga junga masayateter ajisüaka Jude-ibo kanga junga asaya arudar. Pai tang tashi nung asaya 17 nung goal 15 idaktsür lir kong Barcelona den El Clasico asayaba mapang goal ka idaktsüba densema lir. Pa ya midfield nung asayar ka saka pai goal aika idakja arudar.

Iba naroküm ya taoba mapang Wayne Rooney, Lionel Messi, Paul Pogba, Kylian Mbappe aser Erling Haaland nungeria agizükogo.

ECB-i Jofra dang IPL masayatsü ashi



Luchii/December 5, 2023 (Agencies): England aser Wales Cricket Board (ECB)-i Jofra Archer dang 2024 T20 World Cup atema renemshia alitsü asoshi taruba Indian Premier League (IPL) nung shilem magitsü tetuyuba yirur aser tali asayara ano temang nung timtem tali

bendenloksü akok.

2022 IPL nung Mumbai Indians puri sen crore 8 agi alizükaka, Archer ya MI puri taoba hopta chiokogo. Temetetsü kaji December 19 nü Dubai nung agitsü aliba IPL auction atema züngoksema aliba asayatem rongnung pa tenüng mali.

Arishi küm 28 tain Barbados nungi asayar ya pa indang career nung aiben yirua arudar aser pa May ita IPL asayaba mapang tekatsüla yirushia liasü iba ajanga pa mapang talangka masayateti arudar aser ODI World Cup nunga masayatet.

"Archer asaya tenzüshiba mapang IPL nung asayatsü melena April aser May ita UK nung dang ali nungang pa tajungba anepalutetsü ta ECB-agütsüogo, kechiyong pa kanga i amanger," ta ESPNcricinfo sangdong ka ajanga metetdaksü.

BILEMDANGANG

Bilemdangang: "Kong temulungtetba lir idakji takok lir."